

Tun Mahathir lawat Galeri Yayasan Al Bukhary di British Museum
Astro Awani
16 Jun 2019

LONDON: Tun Dr Mahathir Mohamad pada Sabtu melawat Galeri Dunia Islam Yayasan Al Bukhary di British Museum di Bloomsbury, di sini.

Perdana Menteri meluangkan masa kira-kira sejam melihat bahan-bahan pameran di galeri itu dengan diiringi Timbalan Pengarah muzium Johanathan Williams yang menerangkan tentang pelbagai artifak bersejarah yang melambangkan kegemilangan warisan Islam.

Semasa tiba, Tun Mahathir disambut pegawai muzium, pegawai-pegawai Suruhanjaya Tinggi Malaysia dan anak-anak tokoh perniagaan dan dermawan Tan Sri Syed Mokhtar Al Bukhary - Sharifah Sofia dan Syed Danial.

Turut hadir di galeri ialah Menteri Luar, Datuk Saifuddin Abdullah dan Menteri Belia dan Sukan, Syed Sadiq Abdul Rahman. Kehadiran Tun Mahathir itu menarik perhatian ratusan pengunjung muzium.

Kunjungan itu adalah sebahagian daripada jadual lawatan kerja tiga hari Tun Mahathir ke United Kingdom bermula Sabtu.

Galeri Yayasan Al Bukhary sedang membantu British Museum mempamerkan kembali koleksi penting warisan Islam, dalam usaha mencerminkan hubungan kait antara budaya Islam dengan Dunia Islam pada satu pihak, dan budaya Dunia Mediterranean dan Eropah di satu pihak lagi.

Yayasan Albukhary, sebuah organisasi amal yang memfokus kepada pembangunan sosial, ditubuhkan oleh Syed Mokhtar Shah Syed Nor Albukhary.

British Museum ditubuhkan pada 1753 sebagai muzium nasional awam pertama di dunia, memiliki antara koleksi kekal paling komprehensif terdiri daripada lapan juta karya dan hasil kerja, kebanyakannya bersumber dari era kemuncak empayar British.

© 2019 Astro Awani Network Sdn. Bhd.

(535275-D) All Rights Reserved.

Source: <http://www.astroawani.com/berita-malaysia/tun-mahathir-lawat-galeri-yayasan-al-bukhary-di-british-museum-210159>